

Surat khabar: Utusan Borneo (Tempatan)

Hari/Tarikh: 27/9/2013

Muka surat: 14

Tajuk : Transformasi Fungsi Perpustakaan Ke Arah Pembudayaan Ilmu.



**MEMBUDAYAKAN ILMU:** Kadim (dua kiri) ditemani Fadzil (kiri) melihat pameran buku yang turut dibuka pada Seminar Kepustakawan di UNIMAS semalam.

# Transformasi fungsi perpustakaan ke arah pembudayaan ilmu

**KOTA SAMARAHAN:** Perpustakaan perlu memainkan peranan dalam usaha mentransformasikan fungsinya kepada pemasyarakat perpustakaan ke arah pembudayaan ilmu dalam menyemai rasa cintakan pengetahuan kepada masyarakat.

Selari dengan usaha itu Pusat Khidmat Maklumat Akademik Univeriti Malaysia Sarawak (UNIMAS) menganjurkan Seminar Kepustakawan sebagai platform berkongsi perspektif baharu dalam dunia kepustakawan.

Naib Canselor UNIMAS Prof Datuk Dr Mohamad Kadim Suaidi berkata, usaha itu juga selari dengan agenda transformasi kerajaan untuk meningkatkan imej perkhidmatan awam selain memacu negara menjadi sebuah negara maju dan berilmu.

"Perpustakaan memerlukan masyarakat sebagai pelanggantetap

yang akan memanfaatkan pelbagai perkhidmatan dan kemudahan, pada masa yang sama masyarakat memerlukan maklumat yang dikemas kini dan tepat.

"Oleh itu, peranan perpustakaan dalam mewujudkan budaya ilmu dalam masyarakat amat diperlukan supaya matlamat kita mentransformasikan perpustakaan ke arah pembudayaan ilmu dapat dicapai," katanya.

Beliau berkata demikian ketika berucap pada majlis perasmian Seminar Kepustakawan yang disertai 80 peserta di Auditorium UNIMAS di sini semalam.

Menurutnya, perpustakaan sebagai nadi dan jentera sebuah universiti atau organisasi memainkan peranan yang sangat besar dalam menyokong pengajaran, pembelajaran dan penyelidikan.

Sementara itu, mengulas

mengenai objektif penganjuran seminar itu, Kadim berkata, ia sebagai platform membincang dan memikirkan peranan pustakawan dan pengurus maklumat ke arah anjakan paradigma melalui percambahan idea dan ilmu baharu.

"Selain itu, ia menggalakkan perkongsian maklumat yang pintar dan lestari di kalangan institusi berkaitan dalam memperkasakan perpustakaan," tambahnya.

Pada seminar dua hari yang bermula semalam, sebanyak sembilan kertas kerja dibentangkan oleh profesional dari pelbagai institusi.

Hadir sama Timbalan Naib Canselor UNIMAS (Hal Ehwal Pelajar dan Alumni) Prof Mohd Fadzil Abdul Rahman, Ketua Pustakawan UNIMAS Margaret Simeng dan tetamu kehormat lain.